

Eleccziuns e nominaziuns

Sessiun d'enviern a Berna

■ (anr/ld) Oz, ils 30 da november 2015 cumenza la sessiun d'enviern che dura trais emnas. Il nov parlament sa raduna per la 50avla legislatura. 53 commembers èn novs. 24 n'èn betg vegnids elegids. Suenter la saramentaziun e l'examinaziun dals mandats elegian las chombras lur presidis. Il cussegl naziunal vegn ad eleger *Christa Markwalder* (pld/BE) sco nova presidenta, *Jörg Stahl* (pps/ZH) sco emprim vicepresident e *Dominique de Buman* (pcd/FR) sco segund vicepresident. En il cussegl dals chantuns vegn *Raphaël Comte* (pld/NE) a seser sin la sedia presidiala, *Ivo Bischofberger* (pcd/AI) surpiglia l'uffizi da l'emprim vicepresident e *Karin Keller-Sutter* (pld/SG) vegn segund vicepresidenta.

Omaduas chombras vegnan a nominar lur commembers per las 11 cumissiuns permanentas, per las nov cumissiuns legislativas e per las duas cumissiuns da suveglianza. Ils 9 da december 2015 elegia l'assemblea federala il nov cussegl federal. Quai vul dir la reelecziun dals sis commembers che restan en uffizi ed in nov cusseglier federal per remplazzar *Eveline Widmer-Schlumpf* che ha demissiunà. La pps pretenda in segund sez en il cussegl federal e propona trais candidats, numnadain: *Thomas Aeschi*, Zug, *Guy Parmelin*, Vad ed il Tessinais *Norman Gobbi*. Plinavant elegia il parlament il medem di *Johann Schneider-Ammann* sco president da la confederaziun per l'onn 2016 ed il nov chancelier federal che remplazza *Corina Casanova* che sa retira sin la fin da quest onn. Ils 11 da december 2015 reparta il cussegl federal ils departaments. Il nov parlament vegn a sa fatschentiar cun dumondas da gronda muntada per l'avegnir da noss pajais. En il center stattan dumondas socialas sco l'AVS 2020, las cassas da pensiun, l'energia 2050, las relaziuns cun l'Uniun europeica, la politica d'asil e la nova situaziun da terrur. En vista al rinforz da l'ala dretga (pps e pld) vegnan dumondas socialas, la politica d'ecologia e l'augment da las expensas da la confederaziun a manar a debattas pli difficilas. Gia la discussiun davart il preventiv 2016 vegn a demussar posiziuns pli accentuadas ch'ils onns passads.